




AWIG - AWIG



**DESA ADAT SELAT,
KECAMATAN ABIANSEMAL,
KABUPATEN BADUNG**

MURDHA WAKYA

MURDHA WAKYA

Om Swastyastu,

Kawit saking panghyaning kalih saking asung kerta wara Hyang Widhi Wasa, saha malarapan antuk sagilik saguluk, muah cita nirmala, pamuput sida kasurat awig-awig puniki, pinaka bungkah pamikukuh desa adat sajeroning midabdabin kasukertan krama desa adat malarapan antuk sahanan dharma prawertinia ngrajegan Sang Hyang Aji Agama, manut Sang Hyang Catur Dresta. Sawosang ring kamanggehang Sang Hyang Catur Dresta punika, sane marupa Dharmaning Agama, kamanggehang awig-awig puniki nenten taler lepas saking Pancasila miwah Undang-undang Dasar 1945 rikalaning nyanggra kalih nabdabin Dharmaning Negara.

Mungguing desa adat puniki wantah pawakan pasayuban I krama desa. Manut sastra dresta, desa adat puniki kawentenan ipun satmaka buana agung. Pawongan neri-neri, sinanggeh buana alit. Buana agung lan buana alit punika yan sampun patemonia adung lan manut, mawinan sidha metu santi jagathita, kauripan sukerta sakala lan niskala. Punika sinanggeh murdhaning prayojanan pangriptaning awig-awig.

Desa adat kalihuger-uger papalihanipun manut pisan ring katatwaning Tri Hita Karana sane kamanggehang, kapawos kadi inucap :

1. Parhyangan, maka jiwatmaning muah murdhaning Desa Adat
2. Pawongan, boya sewos wantah ida dane Krama Desa Adat sami sane jumenek ring palemahan Desa Adat Inucap
3. Palemahan, kakuwub pawidangan Desa Adat, manut ring kawentenan kalih kamanggehang wates-watesnyane sane nyatur Desa

Tri Hita Karana miwah Sang Hyang Catur Dresta punika, pinaka wit uger-uger kaanggen awig-awig, kadadosang sad sarga, saha pawos-pawosnyane, sami

mapatitis sidhaning don, ngardinin kasukertan ring Desa Pakraman. Mogi-mogi sida kapanggih Moksartham Jagatdhita Ca Iti Dharma.

Om Santih, Santih, Santih, om

ARTOS NIASA DESA SELAT

1. Niasa Desa Selat marupa Panca Dala mawarna dasar wilis antuk tepi mawarna ireng, makadi lambang Pancasila pinaka pandangan hidup Bangsa lan Dasar Negara Republik Indonesia, pinaka sasuluh kepribadian Bangsa Indonesia.
2. Padi lan Kapas niasa Gemah ripah loh jinawi risajeroning kahuripan Krama Desa Selat (Jagatdhita)
3. Arca lan Lingga yoni niasa Purusa Pradana, pinaka tetamian duk nguni rawuh mangkin sane kabawos sejarah lan Budaya ring Desa Selat
4. Aksara Selat 1901 lan telapak cikor 2 inggian genah tungkalih punika niasa magentos genah Krama Desa Selat lan Krama Desa Adat Gerana warsa 1901
5. Pita sinurat “ Dharma Raksatah Raksitah “ maartos parikrama sane tan lempas saking kapatutan (Dharma), satata jagi polih pasayuban saking Dharma inucap.

Artos niasa Desa Selat sejangkepnia :

Sangkaning Asung Kertha Nugraha Ida Sang Hyang Widhi Wasa (Purusa Pradana) Krama Desa Selat nyujur lan mukti kerahayuan sekala lan niskala (Moksartham Jagatdhita Ca Iti Dharma) maka silih sinunggil wawidangan Negara Republik Indonesia yang berdasarkan Pancasila

ARTOS WARNA NIASA DESA SELAT

1. Wilis artos nia Gemah Ripah lan Sukerta
2. Ireng artos nia Langgeng lan Wicaksana
3. Kuning Emas artos nia Agung lan Kekar
4. Putih artos nia Suci
5. Barak artos nia Lascarya mayadnya, wanen mikukuhin kapatutan

BANTANG AWIG-AWIG DESA ADAT SELAT

Murdha Wakya

Artos Niasa Desa Selat

Bantang Awig-awig Desa Adat Selat

PALEMAHAN

SARGAH I	Aran lan Wewidangan Desa.....	1
	Pawos 1 Aran lan Wewidangan Desa.....	1
SARGAH II	Patitis lan Pamikukuh.....	2
	Pawos 2 Patitis lan Pamikukuh.....	2
	Pawos 3 Patitis Desa.....	2
SARGAH III	Indik Sukerta Tata Agama / Parahyangan.....	3
	Palet 1	
	Pawos 4 Indik Parahyangan Desa.....	3
	Pawos 5 Indik Tata Kramaning Ngewangun Parahyangan Desa.....	5
	Pawos 6 Indik Busana Pelinggih.....	6
	Pawos 7 Indik Pakem Piodalan.....	6
	Pawos 8 Indik Upakara Sane Keaturang.....	7
	Pawos 9 Indik Penyejeran Rikalaning Karya Utawi Piodalan.....	7
	Pawos 10 Indik Panca Gita.....	7
	Pawos 11 Indik Sesana Pemangku Ring Pura.....	8
	Pawos 12 Ngerereh Pemangku.....	8
	Pawos 13 Swadharmaning Pemangku.....	9
	Pawos 14 Indik Nyanggra Rahina Rerahinan Jagat lan Piodalan Pura-pura.....	9
	Pawos 15 Mungga Ring Pelinggih.....	13
	Pawos 16 Kahyangan Kahanan Durmanggala.....	13
	Pawos 17 Kahyangan Kacemerin.....	14
	Palet 2 Pitra Yadnya	
	Pawos 18 Indik Padewasan.....	14
	Pawos 19 Indik Tingkah Pakutangan Sawa Kesetra.....	15

Pawos 20	Sawa Tan Wenang Inepang.....	15
Pawos 21	Pananjung Batu.....	15
Pawos 22	Tata Kertaning Ring Setra.....	15
Pawos 23	Ngulah Pati, Salah Pati.....	16
Pawos 24	Swadharmaning Krama Banjar.....,.....	16
Pawos 25	Indik Pemargi Pitra Yadnya, Rikalaning Ring Pura Kahyangan Desa Pacang Nangun Karya Utawai Piodalan.....	16
Pawos 26	Tan Keneng Cuntaka Metu Saking Kematian.....	17
Pawos 27	Pengabenan Kremasi.....	17
Pawos 28	Indik Panca Baya.....	18
Palet 3		
Pawos 29	Indik Bhuta Yadnya.....	18
Pawos 30	Indik Nyanggra Tawur Kesanga Miwah Penyepian	19
Palet 4		
Pawos 31	Indik Manusa Yadnya.....	19
Palet 5		
Pawos 32	Indik Rsi Yadnya.....	20

SARGAH 1V Pawongan (Sukerta Tata Pawongan)

Palet 1		
Pawos 33	Krama Desa Adat.....	21
Pawos 34	Pawilangan Krama.....	21
Pawos 35	Ngeranjing Dados Krama.....	22
Pawos 36	Swadharmaning Krama.....	22
Pawos 37	Swadharma Krama.....	22
Pawos 38	Swadikara Krama.....	22
Pawos 39	Swadharmaning Krama Tamiu/Tamiu.....	23
Pawos 40	Ayah Miwah Urunan.....	23
Pawos 41	Pawilangan Balu.....	24
Pawos 42	Sekaa Teruna.....	24
Pawos 43	Mapuangkid, Masuksukan, Nebas Ayah.....	24
Pawos 44	Wusan Dados Krama.....	25

Palet 2		
Pawos 45	Indik Prajuru Desa.....	25
Pawos 46	Penyangga Kelian Desa Adat.....	26
Pawos 47	Swadharmaning Prajuru Desa.....	26
Pawos 48	Olih-olihan lan Petias Prajuru Desa.....	27
Pawos 49	Pangentosan Prajuru Desa.....	27
Palet 3		
Pawos 50	Sabha Desa.....	28
Pawos 51	Kerta Desa.....	28
Pawos 52		29
Pawos 53	Banjar Adat.....	29
Pawos 54	Swadharmaning Prajuru Banjar Adat.....	29
Pawos 55	Wewenang Prajuru Banjar Adat.....	30
Pawos 56	Indik Kulkul.....	30
Pawos 57	Tata Tetepakan.....	30
Pawos 58	Kulkul Katepak.....	31
Pawos 59	Kulkul Katepak Sangkaning Tan Gumanti.....	31
Palet 4		
Pawos 60	Paparuman / Pasangkepan.....	31
Pawos 61	Ngemargiang Paruman.....	32
Pawos 62	Tata Titi Paruman.....	33
Pawos 63	Ngawitin Paruman.....	33
Pawos 64	Keputusang Sinanggeh Sah.....	33
Palet 5		
Pawos 65	Lembaga Adat.....	33
Pawos 66	Paiketan Pemangku.....	34
Pawos 67	Paiketan Serati.....	34
Pawos 68	Paiketan Werdha.....	34
Pawos 69	Pecalang.....	34
Pawos 70	Yowana Desa Selat.....	35
Pawos 71	Paiketan Krama Istri.....	35
Pawos 72	Pasraman.....	36
Pawos 73	Sekaa.....	36
Palet 6		

Pawos 74	Pawiwahan.....	36
Pawos 75	Pengambilan Pawiwahan Tan Patut.....	37
Pawos 76	Pawiwahan Manggeh Sah.....	37
Pawos 77	Uger-uger Metu Saking Pawiwahan.....	37
Pawos 78	Pawiwahan Silih Tunggil Tan Rauh.....	38
Pawos 79	Tata Caraning Parabian Nganutin Papinangan...	38
Pawos 80	Tata Caraning Marabian Nglayat, Ngrorod.....	39
Pawos 81	Pikoli Patias Pemangku.....	39
Palet 7		
Pawos 82	Cuntaka, Sebel.....	40
Pawos 83	Suwene Ngambil Cuntaka.....	40
Pawos 84	Tan Keneng Cuntaka Metu Saking Kematian.....	42
Pawos 85	Indik Busana.....	42
Palet 8		
Pawos 86	Tata Caraning Parabian Nyeburin.....	42
Pawos 87	Indik Nyapihan.....	43
Pawos 88	Tata Caraning Palas Marabian.....	43
Pawos 89	Kebo Ngulihin Kandang.....	44
Pawos 90	Palas, Adung Malih.....	44
Pawos 91	Swadharmaning Balu.....	44
Pawos 92	Balu Tan Pageh.....	45
Pawos 93	Balu Sentana Rajeg.....	45
Palet 9		
Pawos 94	Indik Sentana.....	45
Pawos 95	Ngangkat Sentana.....	45
Pawos 96	Paperasan Sinanggeh Sah.....	46
Pawos 97	Sane Patut Kaperas.....	46
Palet 10		
Pawos 98	Indik Warisan.....	46
Pawos 99	Sane Kabawos Ahli Waris.....	47
Pawos 100	Swadharmaningh Ahli Waris.....	47
Pawos 101	Tan Polih Pahan Waris, Kengin Mupunin.....	47
Pawos 102	Warisan Sane Tan Dados Kaepah Wiadin Kaadol	48

SARGAH V Sukerta Lan Pamitegep

Palet 1		
Pawos 103	Indik Druwen Desa.....	49
Pawos 104	Paupon-upon Laba.....	50
Palet 2 Sukertan Lan Pamitegep		
Kaping 1		
Pawos 105	Karang, Tegal Lan Carik.....	51
Pawos 106	Tan Wenang.....	52
Kaping 2		
Pawos 107	Pepayonan.....	53
Kaping 3		
Pawos 108	Wewangunan.....	54
Kaping 4		
Pawos 109	Wewalungan.....	54
Pawos 110	Tata Cara Naban.....	55
Pawos 111	Tan Dados Ngangon.....	55
Pawos 112	Pengutangan Leluwu.....	55
Pawos 113	Narkoba.....	56

SARGAH VI Wicara, Dusta Lan Pamidanda

Palet 1		
Pawos 114	Indik Wicara.....	57
Pawos 115		57
Palet 2		
Pawos 116	Indik Baya lan Dusta.....	58
Pawos 117		58
Palet 3		
Pawos 118	Indik Pamidanda.....	59
Pawos 119		59
Pawos 120		60

SARGAH VII

Pawos 121	Nguwah-Nguwuhin Awig-awig.....	61
Pawos 122		61

SARGAH VIII

Pawos 123	Samapta.....	61
Pawos 124		61

LEPIHAN :

1. Ilikita Indik Panca Yadnya
2. Denah Pura Desa, Puseh, Pura Alasanger, Alasarum, lan Pelinggih Ista Dewata tur wigunania
3. Denah Pura Dalem / Dalem Penataran / Prajapati lan Pelinggih, Ista Dewata tur wigunania
4. Denah Pura Prajapati Pacung, Pelinggih, Ista Dewata, tur wigunania
5. Panitia Perubahan Awig-awig Desa Adat Selat, Kecamatan Kecamatan Abiansemal, Kabupaten Badung
6. Tim Perumus Nguwah – Nguwuhin Awig-Awig Desa Adat Selat, Kecamatan Abiansemal, Kabupaten Badung

PALEMAHAN

SARGAH I

ARAN LAN WEWIDANGAN DESA

PAWOS : 1

Wewidangan Desa Selat :

1. Desa Adat punikimewasta Desa Adat Selat
2. Jimbar wewidangan nyatur luire :
 - ha. Sisi wetan, Desa Taman
 - na. Sisi Kidul Desa Blahkiuh / Sangeh
 - ca. Sisi Kulon Desa Sangeh / Desa Gerana
 - ra. Sisi Lor Desa Adat Samuan
3. Kakuwub palak Desane kaperang sekadi ring sor :
 - ha. Pupulan karang paumahan, sinanggeh palemahan desa adat
 - na. Setra, sawah miwah tegal ring kakuwub palak desane sajabaning palemahan Desa Adat, sinanggeh telajakan Desa.
4. Desa Adat puniki kaepah dados kalih Banjar Adat luihipun :
 - ha. Banjar Adat Selat
 - na. Banjar Adat Tegal
5. Wewidangan palemahan banjare soang-soang kemanggehang olih Paruman Desa.
6. Desa kaepah dados pemaksan manut pamutus paruman desa luihipun :
 - ha. Pemaksan Desa
 - na. Pemaksan Puseh
 - ca. Pemaksan Alasangker
 - ra. Pemaksan Alasarum
 - ka. Pemaksan Dalem Gede
 - da. Pemaksan Dalem Nataran
7. Banjare mawak tangan sukuning Desa, negen duman pakaryan desa saha nyulurang tata pakraman bacaan ayahan, leluputan, urunan, pangampel lan sakaluirnia.

8. Banjar Adat patut maduwe piranti makadi Bale Banjar, Pura Bale Banjar, lan kulkul.

SARGAH II

PATITIS LAN PAMIKUKUH

PAWOS : 2

Desa Adat Selat ngamanggehang pamikukuh :

ha. Pancasila

na. Undang-undang Dasar 1945

ca. Tri Hita Karana manut Sadacara Agama Hindu

ra. Hak Asasi manusia utawi HAM

ka. Peraturan Daerah Provinsi Bali Nomer 4 tahun 2019 tentang Desa Adat Di Bali

da. Uger-uger saking Guru Wisesa sane siosan indik desa adat

PAWOS 3

PATITIS DESA

Patitis Desa puniki luire :

1. Mikukuhan miwah ngrajegang Sang Hyang Agama
2. Nincapang parilaksana wargane ngamargiang Dharma Agama Hindu, lan Darma Negara
3. Ngrajegang sukertaning Desa saha pawongania sekala lan niskala
4. Ngrajegang sangaskaraning pawongan, pamekas sane ngilitang pakulawargan miwah sane mastikayang linggihnia ring Desa Adat
5. Ngrajegang kasukertan druwen Desa miwah druwen pawongania sami
6. Nincapang pangeweruh, kesusilaan lan pangupa jiwa
7. Tan lempas saking uger-uger Guru Wisesa indik Desa Adat

SARGAH III

Palet 1

PAWOS : 4

INDIK PARAHYANGAN DESA

Parahyangan sane wenten ring wewidangan Desa Adat Selat, inggih punika :

A. INDIK PARAHYANGAN DESA (KAHYANGAN TIGA)

1. **PURA DESA**. Megenah ring utamaning mandala maka pelinggih pangarep Pelinggih Padmasana, Pelinggih Gedong Desa taler wenten pelinggih ista Dewata siosan mekadi : gambar terlampir
2. **PURA PUSEH**. Pura Puseh taler megenah ring wewidangan Pura Desa, marupa palinggih gedong. Punika taler pelinggih ista Dewatania makadi ring (Gambar terlampir)

Ring madianing mandala :

PURA BALE AGUNG.

Pura Bale Agung punika megenah ring madianing wewidangan Pura Desa, wigunania :

Genah linggih Pralinggalan Ida Betara-Bethari rikalaning wenten karya ngusaba Desa, miwah rauh rerainan sasih kesanga/penyepian sewarsa apisan. Siosan ring punika wenten taler pelinggih Ista Dewata minakadi ring (Gambar terlampir)

3. PURA DALEM

Pura Dalem sane wenten ring wewidangan Desa Adat Selat manut ring Dewa Tatwania (Lontar Gong Besi) inggih punika :

ha. PURA DALEM

Pura punika megenah ring kelod kangin Desa Adat Selat, wigunania ngemong setra sane wenten ring Desa Pekraman Selat. Ring genah Pura punika taler wenten pelinggih inggih punika (gambar terlampir)

na. PURA DALEM PENATARAN

Pura punika pinaka peyegjeg Desa Pakraman Selat, taler wenten pelinggih Ista Dewantania minakadi ring (gambar terlampir)

4. PURA PRAJAPATI

Wewidangan Pura Prajapati wenten kekalih genah, inggih punika :

- Asiki megenah ring pengulun setra gede
- Malih kalih megenah ring wewidangan pacung, banjar Adat Tegal

Pura Prajapati punika meraga Pura Pengulun Setra, nanging kanton kawawa antuk Pura Dalem

Pura Prajapati ngewawa pelinggih pengulun pengesengan Ista Dewatania Brahma Prajapati

5. PURA ALASARUM LAN PURA ALASANGKER

PURA ALASARUM megenah ring purwaning Pura Desa.

Wenten taler pelinggih pengarep merupa Pajenengan, Ista dewatania sekadi ring (gambar terlampir)

PURA ALASANGKER megenah ring wewidangan Pura Alasarum merupa pelinggih meru tumpeng pitu (gambar terlampir)

6. PURA SWAGINA RING BALE BANJAR

Pura punika meduwe wiguna nunggalin pikayun ikrama Banjar, taler genah aguron-guron, genah peparuman Krama Banjar ngutpeti kasuketan Ikraman Banjar miwah karma Desa Selat maka sami.

Istadewata “ BETARA ISWARA LAN BEGAWAN PENYARIKAN”.

7. ISTA DEWATA PARAHYANGAN

Ista Dewata ring Parahyangan sane kasungsung dening Krama Desa Pakraman Selat manut ring Rontal “ Dewa Tattwa”

ha. PADMASANA : Ista Dewatania Ida Sang Hyang Widhi

na. PURA GEDONG DESA : Ista Dewatania “Bethara Brahma” (Sang Hyang Bama Dewa). Ista Dewata pelinggih sawosan sekadi ring (gambar terlampir)

ca. PURA BALE AGUNG : Ista Dewatania : “Bethari Bhagawati” Ista Dewata Pelinggih siosan mekadi :

- BALANG TAMAK : inggih punika : “ SANG HYANG SIWA WIGENA “
- TEGAL SUCI : ngaran tegal penangsaran inggih punika SANG SURATMA

ra. GEDONG PUSEH : Ista Dewatania Betara Wisnu (Sanghyang Ganapati)

ka. GEDONG PURA DALEM : Ista Dewatania “ Bethari Giri Putri / Dewi Uma “
“pelinggih –pelinggih sane sewosan Ista Dewatania mekadi ring
(gambar terlampir)

da. GEDONG PURA DALEM NATARAN : Ista Dewatania Sanghyang Purusangkara.

ta. PURA ALASARUM : Ista Dewatania “ BETHARI SRI “

sa. PURA ALASANGKER : Ista Dewatania “ SANGHYANG TRI UPASEDANA”

wa. PURA PRAJAPATI : Ista Dewatania “ BRAHMA PRAJAPATI ”

la. PURA SWAGINA ring Bale Banjar : Ista Dewatania “ BETHARI
MELANTING / BEGAWAN PENYARIKAN “

ma. PURA SUBAK : Ista Dewatania “ BETHARI SRI “

ga. MERAJAN/ SANGGAH KEMULAN: Ista Dewatania “ BETHARA HYANG
GURU “

PAWOS : 5

INDIK TATA KRAMANING NGEWANGUN PARAHYANGAN DESA

Yening pacang ngewangun Parahyangan Desa Patut anutin ring uger-uger
kadi ring sor :

ha. Yening pacing ngewangun Prahyangan Desa sane lami utawi anyar,
patut melaparan antuk Suba Dewasa

na. Wewangunan punika patut manut ring wilangan Asta Kosala-Kosali

ca. Rikalaning pacang ngwangun Parahyangan, patut manut supacarania
kadi tata cara Agama Hindu Bali

ra. Rikalaning pacang ngunggahang krereb utawi nedunang kerereb patut
ngangge jejaton, sane ngenahang patut dane Pemangku

ka. Piranti-piranti wewangunan sane kagentosin, tur lakar ipun ten
keanggen malih, patut lakar punika kegeseng utawi kependem ring
wewidangan Pura

da. Rikalaning wenten wewangunan Prahyangan patut wenten Yasa
serahina

PAWOS 6

INDIK BUSANA PELINGGIH

Manut sekadi kewentenan Seni Budaya miwah daging Agama Hindune ring Bali, pelinggih-pelinggih punika kekaryaning busana pinaka tejan Ida Betara sane melinggih mekadi :

ha. Pelinggih Padmasana

na. Pelinggih Gedong Agung

ca. Pelinggih Gedong Alit

ra. Pelinggih Meru

ka. Pelinggih Tugu-tugu

da. Pelinggih Bale Agung

ta. Pelinggih Bale Piyasan

sa. Bale Gong

PAWOS : 7

INDIK PAKEM PIODALAN

Yening indik pakem sesana piodalan ring Pura-pura penyungsungan Desa, manut Sastra acara Agama, pemargin upacara piodalan weten petang (4) paosan, luwire :

- i. Upacara Piodalan Nyepen (alit)
- ii. Upacara Piodalan Ngeramen (jelih)
- iii. Upacara Piodalan Nadi : 4 warsa apisan Nyatur
- iv. Upacara Piodalan nemoning purnama (manut parerem)

PAWOS : 8

INDIK UPAKARA SANE KEATURANG

Yening indik sarana upakara sane keaturang ring Pura-pura Kahyangan Desa, rikalaning enjek piodalan utawi karya, manut Tri Pramananing kadi ringh sor punika :

ha. Sarana Upakara manut kanista (nista)

na. Sarana Upakara manut Madya

ca. Sarana Upakara manut Utama

PAWOS : 9

INDIK PENYEJERAN RIKALANING KARYA UTAWI PIODALAN

Rikalaning wenten enjek karya miwah piodalan , pacang kemargiang penyejeran manut ring sor :

ha. Rikalaning wenten karya, kemargiang penyejeran 7 (pitung) rahina ngraris mesineb.

na. Rikalaning enjek Piodalan Jelih, kemargiang penyejeran 3 (tigang) rahina, ngraris mesineb.

ca. Rikalaning enjek Piodalan Nadi, kemargiang penyejeran 3 (tigang) rahina, ngraris mesineb.

Ra. Rikalaning piodalan nyepen (alit) nenten kemargiang penyejeran, wospisan.

PAWOS : 10

INDIK PANCA GITA

Indik kewentenan Pnca Gutha, patut kemargiang rikalaning wenten karya utawi piodalan jelih, piodalan nadi ring Pura-pura luwir ipun :

ha. Wenten petengeran suaran Gong/Angklung/Gender/Gambang

na. Wenten petengeran suaran Kulkul/Gendongan

ca. Wenten petengeran suaran Kekidungan, Kekawin, Palawakiya

ra. Wenten petengeran suaran Genta

ka. Wenten petengeran suaran Japa, Mantra, Puja, Weda.

PAWOS : 11

INDIK SESANA PEMANGKU RING PURA

Pemangkune patut ngelarang daging-daging sesanane kadi ring sor :

1. Amari Wesa
2. Amari Haran
3. Amari Sesana
4. Amari Susrusa

PAWOS : 12

NGEREREH PEMANGKU

1. Ring soang-soang pura patut kawentenang Pemangku
2. Ngadegang Pemangku manut dudonan :
 - ha. Nunas pawuwus Widhi utawi Nyanjan
 - na. Ngwilangin saking turunan utawi waris
 - ca. Papilihan Krama Desa
3. Tan wenang kaanggen mangku luwire :
 - ha. Ceda angga saking wawu medal mekadi : peceng, perot, cungh, sengkok, lan sapanunggalan ipun.
 - na. Kageringan mekadi : sakitila, ayan, buduh, lan sapanunggalan ipun.
4. Prabia ngadegang mangku mekadi ngwintenan utawi ring sedane patut katanggung olih krama Desa manut pararem.
5. Yening wenten kelayu sekar ring jero umah pemangku, wenang I pemangku ika nyepuh.

PAWOS : 13

SWADHARMANING PEMANGKU

1. Swadharmaning pemangku kukadi ring sor :
 - ha. Nitening nuntun kesucian ring Kahyangan
 - na. Ngenterang Upakara-upakara ring Kahyangan, kalih I Krama Desa Soang-soang wenang seageng-ageng ipun mapulagembal

2. Yen wenten sang mapanauran mangda masadok ring prajuru Desa, wus punika wawukaan tebang
3. Penauran marupa barang, jinah, sami dados druwen Desa
4. Busanania rikala ngenterang upacara lanang sarwa putih, istri sarwa putih

PAWOS : 14

INDIK NYANGRA RAHINA RERAHINAN JAGAT LAN PIODALAN PURA-PURA

1. RAHINA RERAINAN ALIT MEKADI :

- ha. Rahina Purnama
- na. Rahina Tilem
- ca. Rahina Kajeng Kliwon
- ra. Rahina Anggara Kasih
- ka. Rahina Buda Kliwon
- da. Rahina Tumpek

2. RAHINA RERAINAN AGENG mekadi :

HARI	PANCA WARNA	WUKU	RAHINA AGUNG	ISTA DEWATANIA/UPAKARA
Rabu/buda	Kliwon	Sinta	Pagerwesi	Sanghyang Pramesti Guru
Sabtu/saniscara	Kliwon	Landep	Tumpek Landep	Sanghyang Pasupati
Sabtu/saniscara	Kliwon	Wariga	Tumpek Wariga /Uduh /Bubuh /Pengarah	Sanghyang Sangkara
Rabu/buda	Pon	Sungsang	Sugian Tenten	Meresik alat Pelinggih “Perengge”
Kamis/wrespati	Wage	Sungsang	Sugian Jawa	Mererebu
Jumat/sukra	Kliwon	Sungsang	Sugian Bali	Mohon Tirta Gocara

Minggu/redite	Paing	Dunggulan	Penyekeban	ring Hyang Siwa Guru Melaksanakan Tapa Yoga Semadi
Senin/soma	Pon	Dunggulan	Penyajaj	Melaksanakan Ayekung Jnana
Selasa/anggara	Wage	Dunggulan	Penampahan Galungan lan Memenjor	Tebasan Penampahan Nyomia Sang Kala 3 dados Sang Kala Hita ring tengahin natah
Rabu/buda	Kliwon	Dunggulan	Galungan	Sanghyang Siwa Mahadewa
Kamis/wrespati	Kliwon	Dunggulan	Umanis Galungan	Banten Penyangran
Sabtu/saniscara	Pon	Dunggulan	Pamaridan Guru	Nyurud Panugrahan
Minggu/redite	Wage	Kuningan	Ulihan	Para Dewata mantuk ke Kahyangan
Senin/soma	Kliwon	Kuningan	Pemacekan Agung	Ritatkala metirta ngider Kiwa
Jumat/sukra	Wage	Kuningan	Penampahan Kuningan	Tan wenten upacara puja
Sabtu/saniscara	Kliwon	Kuningan	Kuningan	Memohon Amertha, Kepradnyan ring Sang Hyang Maha Dewa lan Para Leluhur
Rabu/buda	Kliwon	Pahang	Pegatwakan	Melepas Tapa, lan nyekung puja mantra
Sabtu/saniscara	Kliwon	Uye	Tumpek Andang /kandang	Korban suci untuk : Hewan, Sato, Mina, Paksi, Manuk, Gumatap-Gumitip siosan, Hyang Brahma Rudra

Sabtu/saniscara	Kliwon	Krulut	Tumpek Krulut	Piodalan Taksu : Gong, Angklung, Gambang, Topeng, Rangda, Barong, Gelungan Sesuhunan, Kulkul
Sabtu/saniscara	Kliwon	Wayang	Tumpek Wayang	Nunas Tirta Wayang Sapuleger
Minggu/redite	Kliwon	Watu Gunung	Kliwon Pemelas Tali	
Senin/soma	Umanis	Watu Gunung	Candung Watang	
Selasa/anggara	Paing	Watu Gunung	Paid – Paidan	
Rabu/buda	Pon	Watu Gunung	Buda Urip	
Kamis/wrespati	Wage	Watu Gunung	Urip Kalantas	
Jumat/sukra	Kliwon	Watu Gunung	Pengeradanan	
Sabtu/saniscara	Umanis	Watu Gunung	Saraswati	
Minggu/redite	Paing	Sinta	Banyu Pinaruh	
Senin/soma	Pon	Sinta	Soma Ribek	
Selasa/anggara	Wage	Sinta	Sabuh Mas	
-	-	-	Nyepi	
-	-	-	Siwaratri	

**3. TEGAK RAHINA PIODALAN RING PURA-PURA KAYANGAN DESA MIWAH
PURA BANJAR**

Mekadi :

Riantukan kewentenan ring jagat mangkin, ikrama Desa patut sampun
nincapan pikayun, mangda kramane inang ngemargiang Adat,

Agama, utamaning pacang kewarisin olih para sentana riwekasan, mawinan tegak piodalan kakaryanin pakem kadi ring sor :

ha. Piodalan ring Pura Desa lan Pura Puseh miwah ring Pura Bale Agung kemargiang ring rahina Buda Kliwon, Wuku Sinta, angken 6 (enem) sasih piodalan nyepen, a warsa piodalan jelih. Piodalan nadi 4 warsa apisan.

Na. Piodalan ring Pura Dalem kemargiang ring rahina Anggara Kliwon, Wuku Dukut, angken 6 (enem) sasih piodalan nyepen, a warsa piodalan jelih.

ca. Piodalan ring Pura Dalem Penataran kemargiang ring rahina Anggara Kliwon Kulantir angken 6 (enem) sasih piodalan nyepen, a warsa piodalan jelih.

ra. Piodalan ring Pura Prajapati kemargiang ring rahina Saniscara Kliwon, Wuku Landep, angken 6 (enem) sasih piodalan nyepen, a warsa piodalan jelih.

ka. Piodalan ring Pura Alasarum kemargiang ring rahina Buda Manis, Wuku Dukut, Ring Pura Alasangker kemargiang ring rahina Buda Wage, Wuku Kelawu angken 6 (enem) sasih piodalan nyepen, a warsa piodalan jelih.

da. Piodalan Ratu Sakti kemargiang ring rahina : Anggara Kliwon, Wuku Kulantir angken 6 (enem) sasih piodalan nyepen, a warsa piodalan jelih.

ta. Piodalan ring Pura Banjar Adat Selat kemargiang ring rahina : Purnama Kelima a warsa.

sa. Piodalan ring Pura Banjar Adat Tegal kemargiang ring rahina : Saniscara Kliwon, Wuku Wariga, angken 6 (enem) sasih, piodalan nyepen, a warsa piodalan jelih.

PAWOS : 15

MUNGGAH RING PELINGGIH

1. Sajawaning pemangku tan wenang munggah ring pelinggih, yan tan polih panugrahan saking I parajuru
2. Yen wenten murug ring ajeng pawos 15 No. 1 keni jadma ika denda mrayascita pelinggih agung alit manut prarem sastra agama

PAWOS : 16

KAHYANGAN KAHANAN DURMANGGALA

1. Kasamber kilap, katiben angin tur pungkut
2. Katunuan, puun
3. Karubuhan taru agung
4. Katiban lulut
5. Karanjingan pandung
6. Karanjingan buron agung
7. Kasiratan rah manusa
8. Wong masanggama. Mabacin, mawarih ring jeroan pura
9. Wong sampun meketus mabacin, mawarih ring jeroan pura
10. Wong masanggama lanang sareng lanang, istri sareng istri, inucap badu wasa
11. Kelebon Amuk
12. Keranjingan wong edan, miwah wong sakit ila (lepra)
13. Kelinduan (kelinuhan)
14. Keumahin nyawan utawi tabuan sirah

PAWOS : 17

KAHYANGAN KACEMERIN

Kahyangan kebaos kacemerin, , makadi :

1. Jadma mesalin wastra sajeroning pura
2. Jadma ngetelang toya susu

3. Jadma mawiadi, wakpurusa, mabaos sane kaon-kaon sajeroning pura
4. Jadma lanang wadon sampun dahi teruna sirep dados asiki ring sajeroning pura

Yening wenten kahyangan kahanan kadi ring ajeng pawos 16, 17 yan saking pakardin manusa, wenang jadma ika kadanda, mrayascita manut sastra agama, agung alit manut prarem.

Yan tan pakardin manusa, gumanti saking buana, I prajuru Desa patut kadi ring sor :

1. Ngwetenang aci pamarisuda, manut sastra agama
2. Ngutsahayang mangda piodalan pura panyiwian Desa sida mamargi anut panumaya agung alit manut sastra agama

Palet 2

PITRA YADNYA

PAWOS 18

INDIK PADEWASAN

Yening indik padewesan kemargiang ring Desa Adat Selat mekadi ring sor :

- ha. Subha dewasa pemargin upacara Dewa Yadnya
- na. Subha dewasa pemargin upacara Pitra Yadnya
- ca. Subha dewasa pemargin upacara Manusa Yadnya
- ra. Subha dewasa pemargin upacara Bhuta Yadnya
- ka. Subha dewasa pemargin upacara Rsi Yadnya

PAWOS : 19

INDIK TINGKAH PEKUTANGAN SAWA KESETRA

Yening indik pekutangan sawa kesetra sane nenten manut mekadi :

- ha. Pekiriman Wangke
- na. Mekajang Wangke
- ca. Ngelangkahing Wangke
- ra. Miwah sane siosan manut kekeran Desa Adat sane kasurat ring ilikita

PAWOS : 20

SAWA TAN WENANG INEPANG

Sawa tan wenang inepang, tan keni larangan nglangkar watang (mekutang ngemargining margi asiki, dina tunggal, tan wenang sane ungkuran nglitangan sane dumunan, patut dumunan sane ngampetin setra)

1. Anak alit during meketus
2. Rikalaning jagat keni gering grubug

PAWOS : 21

PANANJUNG BATU

1. Yen wenten sawa dura desa, jadma sewos desa, matanem wiadin ngeseng sawa ring setra Desa Adat Selat, patut keni pananjung batu, agung alit manut prarem.
2. Sabobot danda punika kadruwenang olih Desa.

PAWOS : 22

TATA KERTANING RING SETRA

1. Tan wenang mekarya undag-undag gumanti sane mewasta kuburan langgeng.
2. Tan wenang nginepang bangbang
3. Tan wenang nunjel miwah nanem sawa tatiga rahina ring setra tunggal, yan wenten nglurug kadi ring ajeng keni denda, agung alit manut pararem kalih manut sastra agama.
4. Tan wenang melebeng matah ring setra tunggal.

PAWOS :23

NGULAH PATI, SALAH PATI

Padem ngulah pati, salah pati mangda kaprateka nganutin upacara sekadi mati/seda bener, upacarane madudonan manut sastra agama, kadi ring sor :

1. Yan padem/seda salah pati, ngulah pati, mangda kewentenang upakara penebusan, upacaraane megenah ring setra.
2. Yen padem/seda ngulah pati, sewosan ring setra, upakara penebusan maweweh upakara pangulapan, upacaraane megenah ring genahe padem, pempatan, pateluan muah cangkem setra upacaraane dadosang siki ring sawane mapendem/ngaben.
3. Taler nenten ngirangin pamutus sang pamuput sane kaanggehang.

PAWOS : 24

SWADHARMANING KARMA BANJAR

Swadharmaning karma banjar rikalaning ngemong kalayu sekaran mapendem, ngaben, kadabdab sajeroning awig-awig, kalih pararem banjarnia soang-soang.

PAWOS : 25

INDIK PAMARGIN UPACARA PITRA YADNYA, RIKALANING RING PURA KAHYANGAN DESA PACANG NANGUN KARYA, UTAWI PIODALAN

Rikalaning ring pura Kahyangan Desa pacang nangun karya utawi piodalan, wenten wargane kalayu sekaran pamargi sawane manut pararem.

PAWOS : 26

TAN KENENG CUNTAKA METU SAKING KEMATIAN

Sane tan keneng cuntaka makadi :

1. Sang sane meraga putus makadi Pemangku lan Sulinggih
2. Rikalaning ngaturang Dewa Yadnya/sampun mapangalang sasih
3. Banjar tan keneng sebel sadurung kulkul masuara manut pawos 57,ka

PAWOS : 27

PENGABENAN KREMASI

Indik ngaben kremasi ring jaman globalisali sekadi mangkin magda tan lempas saking tetujon agama hindu inggih punika moksartam jagadhita ya ca iti dharma lan moksartam atmanam patut pidabdabin sane anggen uger- uger sajeroning pamutus inggih punika tri samaya (atita, wartamana, nagata), tri pramana (pratiaksa, anumana, agama), rasa, usaha, lan logika, taler mangda manut ring desa, kala, patra.

Yening wenten silih sinunggil krama Desa Selat jagi ngemargiang ngaben kremasi mangda manut ring :

1. Ala ayuning dewasa, tingkatan upakara : nista, madya, utama
2. Polih pamutus prajuru Desa Adat / Banjar Adat
3. Tan lempas saking kereran Desa Adat
4. Tan lempas saking pararem Desa Adat / Banjar Adat

Sane dados ngaben kremasi inggih punika :

1. Yening seda sangkaning keni gering sane malalah mekadi : HIV/AIDS, COVID-19, utawi sane siosan
2. Yening wenten krama seda ring karang desa tunggil dereng lintang a warsa
3. Yening wenten krama seda ring dura provinsi Bali utawi dura Negara

Yening wenten krma desa sane mamurug uger-uger lan pararem inucap, patut katibakin danda inggih punika :

1. Tan polih suaran gendongan/kulkul
2. Tan polih penyangra krama banjar adat
3. Tan polih patus
4. Patut ngemargiang pamarisudha bumi manut sastra agama

PAWOS : 28

INDIK PANCA BAYA

Yening indik wenten panca baya makadi :

ha. Kegenibaya

na. ketoyabaya

ca. kebayubaya/kerubuhan taru agung

ra. Kerereban lemah agung

ka. Kelabuhan amuk

Palet 3

INDIK BHUTA YADNYA

PAWOS : 29

1. Bhuta Yadnya punika yadnya sane katur ring Bhuta Kala

2. Upacara Bhuta Yadnya katah kebaos mecaru

Caru inucap nista, madia, utama, manut kawigunan kadi ring sor :

ha. Masaiban, ngejot yadnya sesa sabran rahina sawusan ngrateng

na. Eka Sata

ca. Panca Sata

ra. Panca Sanak

ka. Panca Kelud

da. Rsi Guna

ta. Nangluk Merana

sa. Tawur Agung

wa. Balik Sumpah

PAWOS : 30

INDIK NYANGGRA TAWUR KESANGA, MIWAH PENYEPIAN

Indik nyanggra rahina penyepian, maduwe piranti upacara mekadi :

1. Pemembenan

2. Pemelastian

3. Pemiak miwah pengerupukan

4. Penyepian

5. Ngembak Geni

Palet 4

INDIK MANUSA YADNYA

PAWOS : 31

1. Manusa yadnya inggih punika upakara-upakara, dharmaning manusa, ngawit saking kamargiang dharmaning mapawarangan ngantos kamargiang upacara pawintenan
2. Upacara kadi ring ajeng madudonan sekadi ring sor :
 - ha. Magedong-gedongan kamargiang risampun bobotane mayusa 6 sasih
 - na. Duk rare medal utawi embas (lekad rare)
 - ca. Kepus udel
 - ra. Roras rahina
 - ka. Tutug akambuhan
 - da. Tigang sasih (3 sasih)
 - ta. Pawetuan/otonan (6 sasih)
 - sa. Tutug kelih (ngraja wadone, ngembakin lanange)
 - wa. Matatah/ mapandes
 - la. Wawiwahan
 - ma. Mawinten
3. Upakara – upakara inucap nista, madya, utama manut sastra agama saha catur dresta, maka buatan desa dresta, ngawinang sima cara desa

Palet 5

INDIK RSI YADNYA

PAWOS : 32

- ha. Sang sane pacang madeg sulinggih, pandita utawi pinandita pinaka sang sadaka, balian sonteng, kubayan, salwire jagi ngenterang yadnya patut masadok ring prajuru desa
- na. Sang sane pacang madeg sulinggih utawi pandita patut masadok ring prajuru desa kalih Parisadha Hindu Dharma
- ca. Prajuru desa patut nitenin prade wenten kecihna lempas ring kakecap miwah drestane, tur sareng nyaksinin upacara saha nyobyahang ring paruman desa tegap rawuhing wates kawenangan pengenter yadnya

PAWONGAN

SARGAH IV

SUKERTA TATA PAWONGAN

PALET 1

PAWOS : 33

KRAMA DESA ADAT

1. Sane kebaos krama Desa Adat Selat inggih punika :
Sahananing warga masyarakat Bali sane meagama Hindu sane mipil turmaning sinurat ring ilikita ring desa adat tur nyungkemin ngeranjing mekrama desa adat.
2. Krama Tamiu inggih punika :
Warga masyarakat Bali sane meagama Hindu sane nenten mipil sakewanten sinurat ring ilikita desa adat.
3. Tamiu inggih punika :
Siosan saking krama Desa Adat lan krama tamiu sane wenten ring wewidangan Desa Adat Selat sane tan gumanti jenek , sakewanten sinurat ring ilikita Desa Adat Selat.
4. Wong Desa inucap linggihnia kalih soroh luire :
ha. Wong Desa sane meagama hindu, tur nyungkemin ngranjing makrama, sinanggeh krama desa
na. Anak, Rabi, Kula Gotra rob-robnya sinanggeh krama desa
ca. sajaba sane munggah ring ajeng sinanggeh tamiu

PAWOS : 34

PAWILANGAN KRAMA

Bacakan krama luire kadi ring sor :

1. Krama ngarep wong desa sane nyakap karang desa
2. Krama paron, wong desa sane mapumahan ring karang kedi
3. Krama pengele, wong desa sane kakuwub ring krama ngarep

PAWOS : 35

NGRANJING DADOS KRAMA

Ngranjing dados krama kadi ring sor :

1. Sangkaning nyakap karang Desa
2. Sangkaning pinunas ring Desa Adat

PAWOS : 36

SWADHARMANING KRAMA

Swadharmaning krama kadi ring sor :

1. Nyejerang saha tinut ring daging awig-awig
2. Bhakti kalih sutindih ring desa
3. Sareng ngutsayang petites desane (pawos 3)
4. Natak tis panes merupa ayah lan urunan ngardi kebecikan desane sekala-niskala

PAWOS : 37

SWADHARMA KRAMA

Krama sane sinurat ring pawos 33 maderbe swadarma ring desa adat luire :

1. Krama Desa Adat: ngemargiang swadarma jangkep ring baga parahyangan, baga pawongan, lan baga palemahan
2. Krama Tamiu : ngemargiang swadarma mawates ring baga parahyangan, baga pawongan, lan baga palemahan
3. Tamiu : ngemargiang swadarma mewates ring baga parahyangan, baga pawongan, lan baga palemahan

PAWOS : 38

SWADIKARA KRMA

Krama sane sinurat ring pawos 33 maderbe swadikara di Desa Adat Selat luire :

1. Krama Desa Adat : maderbe swadikara jangkep ring baga parahyangan, baga pawongan, lan baga palemaha
2. Krama Tamiu : maderbe swadikara mewates ring baga parahyangan, baga pawongan, lan baga palemahan
3. Tamiu : maderbe swadikara mewates ring baga parahyangan, baga pawongan, lan baga palemahan

PAWOS : 39

SWADARMANING KRAMA TAMIU / TAMIU

1. Wong desa sane sinanggah krama tamiu / tamiu patut ngawi kesucian miwah kasukertan desane
2. Krama tamiu / tamiu kaepah dados kalih soroh :
ha. Tamiu sane meagama hindu
na. Tamiu sane nenten meagama hindu
3. Krama Tamiu pemargine madudonan sekadi ring sor :
ha. Krama Tamiu sane wenten ngeroban masengker asasih mangda naur pengampel pengarga 1kg beras adiri nyabran asasih
na. Krama Tamiu sane jenek saha sampun medue genah (umah) patut nedunin mekrama desa sangkaning pinunas krama tamiu/tamiu inucap saha naur pengampel manut pararem
4. Tamiu sane nenten meagama hindu naur pengampel adiri nyabran sasih manut pararem
5. Ayah pasuka dukane merupa pemargi ngutsahayang kasukertan sekalaniskala
6. Krama Tamiu / Tamiu polih pasayuban rikalaning kahanan panca baya
7. Krama desa sane nerima tamiu sekirang-kirangnyane 24 jam mangda mesadek ring kelian banjar
8. Siosan ring sane meagama hindu jenek ring wewidangan Desa Adat Selat patut nginutin daging awig-awig

PAWOS : 40

AYAH MIWAH URUNAN

1. Krama ngarep wenang ngamedalang ayah kalih urunan mepek
2. Krama paron miwah krama pengele pemargine kadi ring sor :
ha. Indik ayah nganutin bebuatane
na. indik urunan jinah $\frac{1}{4}$ saking pengarep

PAWOS : 41

PAWILANGAN BALU

Bacakan balu wenten kalih paos, luire :

1. Balu nglintik
2. Balu ngempu

PAWOS : 42

SEKAATERUNA

Ayah Sekaa Teruna kamedalang olih warga Desa, sane sampun inucap dahi utawi teruna. Tedunyané melarapan Sekaa Teruna ring Banjarnyané soang-soang.

PAWOS : 43

MAPUANGKID, MASUKSUKAN, NEBAS AYAH

1. Krama kengin mapuankid saantukan sungkan, matepetan anak sungkan muah meleluasan
2. Suen mapuankid kasukserah I Prajuru, nganutin bebuatannyané
3. Kengin masuksukan antuk sang sane sampun dahi wiadin teruna
4. Kengin nebas ayah yan arang wenteng ring puriné utawi sane dados parayoga/pegawai
5. Penebas ayah setunggil warsa sekadi ring sor :
 ha. Panebas ayah ring Banjar mangda kebaosan ring Banjar
 na. Panebas ayah ring pemaksan mangda kebaosan ring pemaksan
 ca. Panebas ayah ring Desa mangda kebaosan ring Desa

PAWOS : 44

WUSAN DADOS KRAMA

Wusan dados krama sangkaning :

1. Pinunas ngraga sangkaning kesah ke dure Desa muah sias-siosan

2. Kanorayang olih desane santukan setata ngae biota wiadin ngamandalin
Awig-awig Desa Adat
3. Sulur wiadin tata cara nganoroyang krama luire :
 - ha. Sampun pastika ring kaiwang-iwangania mekadi ngawe biota wiadin
ngamandalin awig-awig
 - na. Kasisipan katiwakin olih paruman Desa
 - ca. Yan sang kasisipan kawehin pengampura olih paruman desa, warga
punika patut katiwakan danda (pengapok) dumogi sida malih tedun
mekrama desa
 - ra. Agung alit danda manut pararem
4. Kapatutan sang wusan mekrama :
 - ha. Yan ayah ngarep patut ngaturang karang ayahannyane ke Desa
 - na. Tan polih pah-pahan druwen desa, banjar utawi pemaksan

Palet 2

PAWOS : 45

INDIK PRAJURU DESA

1. Desa Adat Selat kaenterang antuk Kelian Desa Adat
2. Banjar miwah pemaksan kaenterang antuk Kelian Banjar Adat miwah
Kelian Pemaksan
3. Sahanan Kelian mawiwit saking Krama Desa sane :
 - ha. Uning ring tata susila adat Agama Hindu
 - na. Maduwe hak pilih manut Undang-Undang pemilihan
 - ca. Tan katempuh wicara pidana
 - ra. Tan sungkan-sungkanan
4. Kelian Desa patut kadegan olih Paruman Desa, selamin-lamin ipun 5 (
limang) warsa, tur kengin kapilih malih
5. Kelian Banjar Adat muah kelian pemaksan keadegang olih Pasangkepan
Banjar muah Pasangkepan Pemaksan selamin-lamin ipun 5 (limang)
warsa, tur kengin kapilih malih
6. Kelian Desa Adat, Kelian Banjar Adat muah Kelian Pemaksan ngawit
ngemargiang swadarmannyane soang-soang sesampune puput
manggeh kapilih, saha puput atur ring Pura Desa Bale Agung

PAWOS : 46

PENYANGGRA KELIAN DESA ADAT

Kelian Desa Adat kasanggra olih :

1. Patajuh utawi pangliman pinaka wakil
2. Penyarikan pinaka juru surat
3. Sedahan pinaka juru raksa druwen desa
4. Kelian banjar adat pinaka pangrancang pasukadukan kaabih olih patujuh
5. Kestinoman pinaka juru arah
6. Kelian Pemaksan pinaka pangrancang krama tempekan pura
7. Pemangku pinaka penuntun adat agama ring pura
8. Pecalang sane nreptiang pamargi ritatkala wenten karya adat lan Agama Hindu

PAWOS : 47

SWADHARMANING PRAJURU DESA

1. Nyusun pangerencana strategis lan program wewangunan Desa Adat
2. Nyusun rencana anggaran pikoli lan prabea pemerintahan Desa Adat (Anggaran Pendapatan dan Belanja Desa)
3. Ngemargiang pangerencana wangunan sekadi kacumawis no 1, 2 inucap
4. Ngawigunayang padruwen Desa Adat sajeroning ngemargiang swadarmaning prajuru desa
5. Ngadegang lan ngentosin pengawas pengurus LPD lan BUPDA sesampune polih tatimbang Sabha Desa Adat
6. Ngemargiang panureksan lan tatimbang ring sajeroning pamargin adat lan budaya ring wewidangan Desa Adat Selat
7. Ngemargiang putusan wicara lan pamidanda sesampune polih katureksain putusan saking Kertha Desa taler sampun kasungkemin olih paruman desa
8. Angganing Desa Adat ring jaba jero pradilan sesampune polih pamutus paruman Desa Adat
9. Kelanggengan keasrian Desa Adat

10. Ngemargiang kewenangan siosan manut awig-awig utawi pararem Desa
Adat Selat

PAWOS : 48

OLIH-OLIHAN LAN PETIAS PRAJURU DESA

Prajuru Desa polih olih-olihan petias kadi ring sor :

1. Upon-upon tanah pecatu manut pararem
2. Laluputan pakenan-kenan polih atenga
3. Cenengan sahanan duman ring Desa, banjar muah pemaksan
4. Saking pikolihi usaha krama guru wisesa

PAWOS : 49

PANGENTOSAN PRAJURU DESA

Prajuru Desa wenang kagentosin :

1. Saantukan seda
2. Saantukan sampun panamaya, manut pawos 45 angka 4
3. Wit saking pinunas
4. Kanorayang saantukan nilar sasana
5. Ngentosin wiadin nganorayang prajuru, patut sajeroning paruman desa

PAWOS : 50

SABHA DESA

1. Sabha Desa Adat kekardinin olih prajuru Desa Adat
2. Angga sabha desa adat mawit saking panua/sesepuh krama desa adat
sane kautus olih banjar adat manut patitis kawiadnyanan nyujur
kasukertan desa
3. Susunan organisasi sabha desa adat inggih punika :
ha. Ketua
na. Patajuh
ca. Angga Parahyangan, Pawongan, lan Palemahan
4. Tata cara ngadegan sabha desa adat :

- ha. Angga sabha desa akehne limang diri
- na. Wikan ring hukum adat lan Agama
- ca. Angga Sabha Desa patut keadegang olih prajuru desa
- ra. Angga Sabha Desa wusan sinarengan ring prajuru desa adat
- ka. Sabha Desa ngaturang tetimbang ring prajuru desa adat sajeroning :
 - Penyusunan awig-awig /pararem Desa Adat
 - Ngerancang wawangunan Desa Adat
 - Ngemargiang pangerancana wawangunan Desa Adat

PAWOS : 51

KERTA DESA

1. Kerta Desa Adat kakardinin olih prajuru Desa Adat
2. Angga kerta desa adat luire :
 - ha. Prajuru Desa Adat
 - na. krma Desa Adat sane madue patitis, kewiadnyanan sajeroning
hukum adat , utusan saking banjar adat
 - ca. Bendesa Adat pinaka ketua sepisanan sekadi angga
 - ra. Angga Kerta Desa Adat keadegang olih prajuru Desa Adat
 - ka. Angga Kerta Desa Adat wusan sinarengan ring prajuru desa adat
3. Swadarmaning Kerta Desa Adat
 - ha. Nampenin, nureksain tur maning nibakan pamutus sajeroning wicara
adat sane wenten ring desa adat kdasar in antuk hokum adat
 - na. Sajeroning ngawentenan pamutus wicara, kainggilan olih kawigunan,
padum pada menyama braya, kilik saguluk paras-paros sarpenaya
 - ca. Yening tan sida ngamolihan pamutus damai kerta desa adat nibakang
pamutus sekadi tersurat ring awig-awig/pararem desa adat
 - ra. Yening kerta desa tan meresidayang ngamolihan pamutus, sane
mawicara dados nunas pamutus ring majelis desa adat manut linggih

PAWOS : 52

Sabha Desa lan Kerta Desa polih olih-olihan lan patias manut pararem.

PAWOS : 53

BANJAR ADAT

1. Banjar Adat/ Banjar Suka-duka ngemargiang sapari polah paindikan soial lan agama ring banjar adat
2. Banjar Adat ngadegang prajuru banjar adat manut pararem banjar adat
3. Pemilihan prajuru banjar adat medasar antuk paras-paros sarpanaya ring pasangkepan banjar adat
4. Kelian banjar adat kesanggra olih petengan /penyarikan sepisanan sekadi juru raksa

PAWOS : 54

SWADHARMANING PRAJURU BANJAR ADAT

1. Ngemargiang tatimbang ring desa adat
2. Ngemargiang awig-awig / pararem desa adat
3. Ngemargiang sekancan tata cara social lan agama ring wewidangan banjar adat
4. Muponin padruwen banjar adat
5. Ngelanggang keasrian palemahan banjar adat

PAWOS : 55

WEWENANG PRAJURU BANJAR ADAT

1. Ngemargiang paruman / pasangkepan banjar adat
2. Mimpin krama banjar adat sajeroning kegiatan social, keagamaan lan pelestarian palemahan banjar adat
3. Ngicenin pamutus wicara adat/pikobet sane wenten ring wewidangan banjar adat

Palet 3

PAWOS : 56

INDIK KULKUL

1. Ring wewidangan Desa Adat Selat, wenten kulkul 5 (imang) soroh luire :
 - ha. Kulkul Pura
 - na. Kulkul Desa
 - ca. Kulkul Banjar
 - ra. Kulkul Pemaksan
 - ka. Kulkul Sekaa
2. Kulkul wenang angge pengasri miwah tetengeran midabdabin kramania soang-soang manut kawigunan

PAWOS : 57

TATA TETEPAKAN

1. Tabuh tetepakan kulkul Pura pinaka pengasrin yadnya nung, ting, banban, ngembat
2. Tabuh tetepakan kulkul Desa nganutin kawigunan
3. Tabuh tetepakan kulkul Banjar manut tetujon soang-soang sekadi ring sor :
 - ha. Upacara dewa yadnya nung, ting
 - na. Upacara bhuta yadnya cacandetan
 - ca. Makarya miwah parum, kalih tulud ngembat
 - ra. Rare embas, limang klentungan ngembat
 - ka. Kalayu sekar, tigang klentungan, ping tiga raris ngembat
 - da. Pengangkatan, bulus atulud, nungting
 - ta. Genibaya, bulus atulud, maweweh gembat
 - sa. Plagandangan, bulus kalih tulud
 - wa. Kabaak, kaamuk, muah sahanan baya pati bulus tigang tulud
4. Tetengeran bayapati utawi genibaya kadi ring ajeng, patut katanggurin olih kulkul banjar siosan.

PAWOS : 58

KULKUL KATEPAK

1. Kulkul Desa utawi kulkul Banjar katepak sangkaning pituduh prajuru desa utawi prajuru banjar

2. Sang nepak kulkul sangkaning baya plagandangan, kaabak, kaamuk, utawi bayapati lianan, patut digelis masadok ring prajuru
3. Krama Desa muah banjar patut nedunin suara kulkul saha makta piranti manut tetengaran tur lumaksana katuntun olih para juru
4. Suaran kulkul tetengaran baya patut katedunin olih sahanan krama lanang rawuhing ayah pasuka-dukan miwah tamiu.

PAWOS : 59

KULKUL KATEPAK SANGKANING TAN GUMANTI

Yan wenten jadma nepak kulkul sangkaning manah iseng, tan gumanti nganutin tetengeran pawos 57, keni jadma punika danda manut pararem.

Palet 4

PAWOS : 60

PEPARUMAN / PESANGKEPAN

1. Paruman ring Desa Adat luire :
 - ha. Paruman Desa Adat
 - na. Paruman Banjar Adat
2. Pesangkepan ring Desa Adat luire :
 - ha. Pesangkepan Desa Adat
 - na. Pesangkepan Prajuru Desa Adat
 - ca. Pesangkepan Sabha Desa
 - ra. Pesangkepan Kerta Desa
 - ka. Pesangkepan Banjar Adat
 - da. Pesangkepan Pemaksan
 - ta. Pesangkepan Sekaa/lembaga Adat sane siosan
3. Paruman Desa mawak pucukin kawisesan, pinaka murdaning kawisesan tan pasaman ritepengan :
 - ha. Mutusang Awig-awig
 - na. Ngadegang Bendesa lan Prajuru Desa sane kapilih
 - ca. Mutusang pengrencana strategis risajeroning pemerintahan Desa Adat

4. Paruman Desa Adat kelaksanayang olih prajuru desa adat sane kerawuihin olih krama desa adat, sabha desa lan kerta desa
5. Ngewangun lan mutusang program Lembaga Perkreditan Desa / LPD
6. Ngewangun lan mutusang Program Baga Usaha Padruwen Desa Adat (BUPDA)
7. Nyusun program tur ngelaksanayang pasraman desa adat

PAWOS : 61

NGEMARGIANG PARUMAN

Paruman ring Desa Selat kemargiang sekadi ring sor :

1. Paruman nadak santukan wenten pikobet sane mabuat
2. Paruman setunggil a warsa nyabran sasih kesanga maosang munjuk lungsur pakraman, ayah-ayahan miwah sane sios-siosan manut kawigunan

PAWOS : 62

TATA TITI PARUMAN

1. Sang sane ngamiletan parum patut mabusana adat madia
2. Rikalaning parum patut ngaturang canang pangrawos saha runtutan ipun magenah ring ajeng sang Rumawos, saha ngaturang piuning ring Bhagawan Penyarikan

PAWOS : 63

NGAWITIN PARUMAN

Peparuman prasida kelaksanayang yan sampun katedunin olih krama langkuningin aparo.

PAWOS : 64

KEPUTUSANG SINANGGEH SAH

Kaputusan paruman sinanggeh sah yan sampun kasungkemin olih krma pamilet parum langkungin ring aparo.

Palet 5

PAWOS : 65

LEMBAGA ADAT

1. Desa Adat Selat medrue lembaga adat
2. Lembaga Adat punika luire :
 - ha. Paiketan Pemangku
 - na. Paiketan Serati
 - ca. Paiketan Werdha
 - ra. Pecalang
 - ka. Yowana
 - da. Paiketan Krama Istri
 - ta. Pasraman
 - sa. Sekaa sane siosan manut kawigunania

PAWOS : 66

PAIKETAN PEMANGKU

1. Paiketan pemangku inggih punika paiketan para pemangku pura sane wenten ring wewidangan Desa Adat Selat
2. Paiketan pemangku ngemargiang parindikan ring Agama, adat, tradisi, seni lan budaya utawi dresta sane kebaos kearifan local

PAWOS : 67

PAIKETAN SERATI

1. Paiketan Serati inggih punika paiketan para serati sane wenten ring wewidangan Desa Adat Selat

2. Paiketan Serati ngemargiang parindikan ring adat, agama, seni lan budaya utawi dresta sane kebaos kearifan local

PAWOS : 68

PAIKETAN WERDHA

1. Paiketan Werdha inggih punika paguyuban para panglingsir (lanjut usia) jagi ngelaksanayang / midabdabin kawentenan para lanjut usia / palingsir
2. Paiketan punika nganutin pabuat para lingsir ring sejeroning :
 - ha. Adat. Agama, seni budaya, lan kearifan local
 - na. Pangewuruhan lan olahraga
 - ca. Kesehatan
 - ra. Ekonomis lan social

PAWOS : 69

PECALANG

1. Pecalang mekadi jaga baya ring wewidangan Desa Adat Selat
2. Pecalang keadegan lan kanoroyang olih Desa Adat medasar antuk pamutus prajuru Desa Adat
3. Siosan ring jaga baya Desa Adat taler madrue swadharma ngwantu tugas aparat keamanan Negara sesampune polih tetimbang saking prajuru Desa Adat
4. Risajeroning midabdabin swadharmaning jaga baya pecalang ngmolihang kawuruhan lan latihan saking lembaga sane kacumawis
5. Risajeroning ngelaksanayang swadharma pecalang polih olih-olihan manut pararem
6. Tugas pecalang keatur ring tuntunan sasanan pecalang
7. Tuntunan sasana pecalang pinaka penetapan saking MDA Provinsi Bali

PAWOS : 70

YOWANA DESA ADAT

1. Yowana Desa Adat inggih punika paguyuban para yowana ring pawidangan Desa Adat Selat
2. Yowana Desa Adat Selat ngemargiang separiindikan usaha daga teruna ring wewidangan Desa Adat Selat luire :
 - ha. Adat, agama, tradisi, seni lan budaya utawi kearifan local
 - na. Kawuruhan lan olahraga
 - ca. Kesehatan
 - ra. Ekonomis lan baga siosan manut cita rasa

PAWOS : 71

PAIKETAN KRAMA ISTRI

1. Paiketan Krama Istri paguyuban para istri krama Desa Adat Selat
2. Paiketan Krama Istri Desa Adat Selat ngemargiang usaha ninggilang usaha desa adat risajeroning midabdbabin kasukertan kula warga mawiwilan saking :
 - ha. Adat, agama, tradisi, seni lan budaya utawi kearifan local
 - na. Kawuruhan lan olahraga
 - ca. Kesehatan
 - ra. Ekonomis lan baga siosan

PAWOS : 72

PASRAMAN

1. Pasraman inggih punika pinaka genah molihang pangewuruhan madasar Agama Hindu jagi anggen ngelimbakang jati diri, nyikiang pikayun nyujur kawentenan krama Desa Selat sane inggil
2. Parindikan tata titi pasraman punika manut parerem

PAWOS : 73

SEKAA

1. Sekaa inggih punika genah kelompok krama sane kewangun olih Desa Adat/ Krama Desa Adat kadasarin antuk minat, bakat, lan pabuat maring seni budaya utawi sane siosan

Palet 6

PAWOS : 74

PAWIWAHAN

1. Pawiwahan inggih punika petemuan purusa lawan pradana, sakalanipun panunggilan pakayun suka cita lan langeng, satia alaki rabi, saha widhi widana manut sastra agama
2. Pamargin pawiwahan sekadi ring sor :
 - ha. Papadikan, kakawitin antuk pakrunan riinin
 - na. Ngerorod, ngrangkat, pengambile riinan, wawu kaetut antuk pakrunan
 - ca. Prade pengambile sewos Agama Hindu, patut ngemargiang upacara sudi wedani
3. Pidabdab sang pacang marabian patut :
 - ha. Nganutin yusa makadi sampun daha truna
 - na. Sangkaning sami pada rena
 - ca. Prade pangambile sewos Agama Hindu, patut ngemargiang upacara sudi wedani
4. Pemargin perabian inucap mangda nganutin UU nomor 1, th 1974

PAWOS : 75

PENGAMBILAN PAWIWAHANTAN PATUT

1. Pengambilan pawiwahan tan kapatutan ring Desa Adat Selat, luire :
 - ha. Ngambil saking pepaksan
 - na. Ngambil gamia gamana
2. Yan wenten melaksana kadi inucap pawos iki, warga ika keni danda, manut pararem

PAWOS : 76

PAWIWAHAN MANGGEH SAH

1. Pawiwahan kemanggehan sah mangda kasaksiang antuk Tri Saksi, mekadi :
ha. Dewa Saksi, widhi widana katur ring sanghyang widhi/bhatara guru
na. Bhuta saksi, widhi widana ring sang bhuta kala, makalan-kalan
ca. Manusa saksi, kasaksiang olih kulawarga, pamekas olih prajuru tur kaunggahang ring sajeroning ilikita tur katumusang ring sang ngawe wenang
2. Upakaranipun manut sastra agama kalih dresta, agung alit manut kawentenan sang manggalaning yadnya

PAWOS : 77

UGER-UGER METU SAKING PAWIWAHAN

1. Pawiwahan sane lumrah, sane lanang mawak purusa
2. Pawiwahan nyeburin, sane istri mawak purusa
3. Pianak/oka sane medal saking pawiwahan ngeranjing kulawarga purusa

PAWOS : 78

PAWIWAHAN SILIH TUNGGIL TAN RAUH

Ring rahina panumaya kamargiang pawiwahan, silih tunggil tan rauh, saantukan wenten karya mabuat pisan, makadi wenten ring dura Negara, ring payudan miwah kapiambeng sewos-sewosan. Mungguing pawiwahan punika wenang kelanturang, kesahang, nanging mangda wenten ilikita ceciren saking sane tan rauh. Kalaning natab widhi widana wenang sane tan rauh kagentosin antuk pengangge. Yan sane lanang tan rauh, patut kagentosin antuk pengangge lanang. Yan sane istri tan rauh wenang kagentosin antuk pengangge istri.

PAWOS : 79

TATA CARANING PARABIAN NGANUTIN PAPINANGAN

Yan papinangan pangambilane patut madudonan sekadi ring sor :

1. Pinih riin nyedek
2. Kaping kalih sang daha patut kaarsayang, kapadik ring reraman kulawarga sang truna
3. Risampune puput babaosane, sami pada adung pamekas sang daha kalawan sang truna. Ring pangambilane patut sang daha mapamit ring pamrajan, miwah ring guru rupakania, malarapan widhi widana, saha kulawarga sang daha nepak kulkul manut pawos 57, 3. da.
4. Ring rahina pawiwahane, sewosan ring mapamit kadi ring ajeng, irika patut sang truna, daha, masadok ring kelian Desa Adat, ring Kelian banjar Adat, ring kelian banjar dinas, pinaka saksi malarapan widhi widana pejati lan jauman saking kulawarga truna, katur ring kulawarga daha maka cihna sang daha sampun puput pawiwahan kalih sampun matilar saking aumahnia sekala lawan niskala.

PAWOS : 80

TATA CARANING MERABIAN NGLAYAT, NGROROD

1. Yan ngrorod, pengambilane sang daha kaengkebang, reramane kemalingin, raris kaetutang kadi pamargin ring sor :
ha. Lumaku
na. Makruna
ca. Ngluku
2. Pamargine lumaku sakirang-kirang ipun arahina kulawarga sang truna ngrauhin genah sang daha, gumanti lumaku saha makta ceciren suala patra pada tresna, ngangkening ngambil sang daha. Sang manampi rerangkaian premangkin mesadok ring prajurunia, nunas mangda gelis nureksa sang ngrangkat ring genah sang daha kaengkebang.
3. Pamargine makruna, ngluku, dinane kapastiang olih sang nruwenang daha.

4. Sang nruwenang daha yen tan cumpu wenang ngwentenang panureksa, uwak-uwakan mangda katuntun tur kasaksinin olih I Prajuru desa adat wiadin dinas.
5. Yan mecihna pengambilane pepaksan, lan tan gumanti saking pada arsa. Wenang kapalasang.
6. Kulawarga sang daha mangda nepak kulkul manut pawos 57 no.3. da. masengker tigang rahina saking lumaku.
7. Ring rahina pawiwahan pemargine pateh kadi pawos 79

PAWOS : 81

PIKOLIH PATIAS PEMANGKU

1. Polih luput utawi patias sekadi ring sor puniki :
 ha. Urunan polih atenga
 na. Polih hasil pelaba atenga sangkaning nyakap
 ca. Prabiya yadnya minakadi : Kajeng Kliwon, purnama, tilem, odalan
 ngasasih, penatengan, galungan, lan kuningan miwah yadnya
 padgatakala prabiane rauh saking desa manut pararem
2. Sarin canang mapah tiga, asiki pamangku, asiki pengemong, asiki ke desa
3. Yan wenten jero mangku sungkan jantos opnama senistane tigang rahina parajuru patut ngaturang sekasidan
4. Pemangku kelayu sekaran : manut pararem

Palet 7

PAWOS : 82

CUNTAKA, SEBEL

Cuntaka sebel wenten kekalih luire :

1. Cuntaka saking padewekan, mekadi ngrajaswala, maduwe oka, karuron, rare during masambutan, nganten durung masakapan, gama gamana, jadma beling nenten wenten ngangkenin, memitra ngalang, panak bebinjat during wenten memeras, during maprayascita, salah timpal.
2. Cuntaka saking kelayu sekar, kematian.

SUWENE NGAMBIL CUNTAKA

1. Cuntaka saking padewekan pengambilan ipun sekadi ring sor :
 - ha. Sebel saking ngraja sewala sakantune ngamedalang rah
 - na. Sebel saking ngamedalan oka suenipun 42 dina lanangnyane kantos kepus udel
 - ca. Sebel saking keruron suenipun 42 dina
 - ra. Sebel saking rare wawu mijil suenipun 3 sasih
 - ka. Sebel saking nganten suenipun selamine during makalan-kalan
 - da. Sebel saking gamia gamana suenipun sedurung kapuputang manut dresta kalih sastra Agama
 - ta. Sebel saking jadma beling nenten wenten ngangkenin suenipun selamine during makalan-kalan
 - sa. Sebel saking memitra ngalang suenipun selamine during makalan-kalan
 - wa. Sebel saking panak bebinjat suenipun sadurungne wenten sane memeras
 - la. Sebel saking salah timpal suenipun sadurungne kapuputang manut dresta kalih sastra Agama
2. Cuntaka saking kalayu sekar (kematian) kadi ring sor :
 - ha. Makinsan (Gumanti ngantosang dewasa)
 - na. Metanem utawi mekinsan digeni
 - ca. Ngaben
3. Pengambilan cuntaka saking
 - Ha. Makinsan (gumanti ngantosang dewasa)
 - ha.1. Yan kulawarga ngarep ngawit saking padem jantos 12 dina saking polih dewasa pangutangane
 - ha.2. Yan kulawarga tan ngarep (pradana) saking padem ngantos 7 rahina saking polih dewasa pangutangane
 - ha.3. Krama Desa tan keni cuntaka
 - ha.4 Pasuwitran sane nyarengin acara punika sebelne ical yan sampun maprayascita
 - Na. Matanem / makinsan digeni

- na.1. Yan kulawarga ngarep ngawit saking padem jantos 12 dina
saking pangutangane
- na.2. Yan kulawarga tan ngarep (pradana) saking padem ngantos 7
rahina saking dewasa pangutangane
- na.3. Krama Desa saking ngawit masuara kulkul kelayu sekaran jantos
tigang rahina dewasa pangutangane

Ca. Ngaben

- ca.1. Yan kulawarga ngarep ngawit saking padem jantos tigang dina
saking dewasa pangabenan saha sampun ngemargiang
pangremekan/pengerorasan
- ca.2. Krama desa ngawit masuara kulkul kalayu seekaran jantos
dewasa pangabenan yan sampun maprayascita cuntakane ical
- ca.3. Yan ngaben ngelanus, mangda kariyinan antuk ngelaksanayang
pangeremekan/pengerorasan

PAWOS : 84

TAN KENENG CUNTAKA METU SAKING KEMATIAN

Sane tan keneng cuntaka makadi :

1. Pemangku lan sulinggih (sang sane meraga putus)
2. Rikalaning ngaturang Dewa Yadnya utawi nyekah sampun mapangalang
sasih
3. Krama Desa tan keneng cuntaka sadurung kulkul masuara manut pawos
57, angka 3. ka

PAWOS : 85

INDIK BUSANA

1. Krama Desa ritatkala upacara yadnya mangda ngangge busana adat
2. Busana adat madudonan kadi ring sor :
 - ha. Suka duka ngangge busana adat madia
 - na. Muspa ngangge busana adat kepura

Palet 8

PAWOS : 86

TATA CARANING PARABIAN NYEBURIN

Yan pengambile nyeburin, pamargine kadi ring sor :

1. Rikalaning makruna ngluku bebaosane adung saking kulawarga sang daha kalih kulawarga sang truna
2. Ring pengambilane mangda nepak kulkul manut pawos 57.3.ka
3. Pamuput pawiwahan ring genah, jeron sang daha tur kesaksian olih prajuru desa
4. Makta jauman ring genah umah nsang truna, kesaksiang olih prajuru desa pateh kadi pawos 79, no. 3. Manut suwala patra wiwaha

PAWOS : 87

INDIK NYAPIHAN

1. Pawiwahan prasida kawusan majalaran palas
2. Wusan mapakurenan riantukan silih sinunggil lampus, kabawos balu
3. Palas marabian wenten sangkaning sami lila, utawi mawiwit wicara kabawos nyapihan
4. Sang jagi palas marabian patut atur supeksa ring sang rumawos / Pengadilan Negeri, I prajuru nyiarang ring banjar, desa kawentenania

PAWOS : 88

TATA CARANING PALAS MARABIAN

1. Sulur palas marabian prada silih tunggil anasar laku, matilar tan pasadok jantos awarsa, wak purusia tan prasida adung malih
2. Yening wicarane katumusang olih lanange, patut sang wadon macihna :
ha. Paradara utawi anasar laku
na. Amandal sanggama, maambul-ambulan jantos awarsa
3. Yening wicarane katumusan olih wadone, patut sang lanang macihna :
ha. Darati krama
na. Wangdu

- ca. Tan nyanggamin saha tan ngwehin pangupajiwa ring sang wadon
suenia jantos awarsa
4. Prade wicaranemacihna kadi ring ajeng, wenten saksi, bukti, ilikkita,
parabinane kening kapalasang
 5. Yening wenten palas marabian sangkaning pada ila :
ha. Pagunakaya patut mapah pada
na. Pabekel tatadan kakuasa niri-niri, warisan kakuasa purusa
ca. Sang purusa ngwehin pianaknia pangupajiwa rauhing saprabia,
manjut swadharmaning guru rupaka
 6. Yan palas marabian majalaran pada lila utawi saking wicara, patut
kaputusan olih Pengadilan Negeri

PAWOS : 89

KEBO NGULIHAN KANDANG

Yan wenten jadm palas marabian saha sampun wenten ilikita, mawali ring
umah ipun prajuru patut sareng natasang indik pagunakaya manut pawos
88.5.ha yening wenten pasadok ring prajuru saha keni kadanda ngwaliang
suaran kulkul, agung alit manut pararem

PAWOS : 90

PALAS, ADUNG MALIH

1. Yening wenten palas makurenan, yadiastun pada lila, macihna adung
malih, patut masadok ring prajuru kakawitin malih ngelaksanayang
widhi widana pawiwahan
2. Yening wenten kadi ring ajeng, keni kadanda ngwaliang suaran kulkul
agung alit manut pararem

PAWOS : 91

SWADHARMANING BALU

1. Soang-soang balu manut kawonganipun kabinayang dados :
ha. Balu luh wit sentana rajeg, miwah balu boya sentana rajeg

- na. Balu muani kapurusan, miwah balu muani nyeburan (boya kapurusan)
2. Swadharmaning balu boya sentana rajeg, utawi kapursan inucap patut :
- ha. Ngemanggehang satyeng rabi, tan kengin paradara utawi dratikrama
- na. Ngawasayang waris, pagunakaya, tan kengin ngadol, ngadeang, makidihang, sajawaning polih kebebasang saking oka utawi kulawarga kapurusan
- ca. Kengin ngangkat sentana, prade sampun wenten pidabdab sadurung sang kapurusa lampus, saha kabebasan olih kulawarga pinih nampek
- ra. Kawenangan mawiwahan malih, prade sampun polih kabebasan saking pianak daha truna utawi kulawarga kapurusa

PAWOS : 92

BALU TAN PAGEH

1. Balu boya sentana utawi kapurusa kabaos tan pageh, luire :
- ha. Sangkaning melaksana dratikrama utawi paradara
- na. Matilar saking paumahan tanpa sadok jantos awarsa
- ca. Ngadol, ngadeang, makidihang druwen warisan tan polih kabebasan saking waris pinih nampek
2. Yan macihna kadi ring ajeng, manut ilikita, kaengin balu inucap :
- ha. Katundung antuk pianak utawi kulawarga kapurusa
- na. Tan polih pahan waris

PAWOS : 93

BALU SENTANA RAJEG

1. Sane kabaos balu sentana rajeg, luire :
- ha. Mawiwit saking pakurenania kaceburin kengin ipun meraga muani
- na. Kamulanipun sentana purusa
2. Balu munggah ring ajeng tan keni pasura ring pawos 91. No.2

Palet 9

PAWOS : 94

INDIK SENTANA

1. Mungguing sentana wenten kaucap sentana rajeg muah sentana paperasan
2. Prade perabiane tan ngawetuang sentana kengin ngidih sentana antuk upasaksi sekala niskala sane kawastanin sentana peperasan

PAWOS : 95

NGANGKAT SENTANA

1. Ngangkat sentana manut dudonan patut macihna antuk widhi widana miwah saksi. Pinaka saksi prajuru Desa lan kulawarga
2. Sane mapakayun ngidih sentana patut sekirang-kirang ipun tigang sasih sadurung dinane kaperas patut masadok ring prajuru
3. I prajuru patut mastikayang tur numusang ring sang yogya makadi perbekel/lurah tur nyiarang ring wewidangane

PAWOS : 96

PAPERASAN SINANGGEH SAH

Paperasan sinanggeh sah, risampune macihna kadi ring sor :

1. Nenten wenten nyangkutin
2. Widhi widana, upakara
3. Kasaksiang olih sameton pinih nampek saking sang kaperas lawan sang memeras, kalih prajuru desa lan dinas kasiarang ring paruman

PAWOS : 97

SANE PATUT KAPERAS

Sane patut kaperas anggen sentana luire :

1. Jadma maagama Hindu

2. Kulawarga saking purusa, yan tan wenten kengin saking wadon. Yan taler tan wenten, kengin saking sewosan
3. Kengin ngangkat sentana langkungan ring adiri

Palet 10

PAWOS : 98

INDIK WARISAN

1. Sane kebawos warisan, tetamian sane merupa arta brana lan ayah-ayahan muah tetegenan saking kulawarga ngarep sane ketiba ring prati sentanania
2. Sane kabawos warisan tetamian sane marupa :
 - ha. Duwe tengah
 - na. Karang paumahan manut pawos 103, no. 7. Tegal miwah carik
 - ca. Arta brana
 - ra. Pemrajan, dadia mkiwah pura, lan sapanunggalan ipun
 - ka. Pagunakaya. Tetatadan, jiwa dana utang piutang lan sapanunggalan ipun

PAWOS : 99

SANE KABAWOS AHLI WARIS

Sane kebawos ahli waris, luire :

1. Pratisentana saking purusa, lanang, wadon, rajeg, paperasan
2. Pratisentana purusa pernah munggaran makadi rerama dinyama muah misan, mindon
3. Pratisentana pernah kesamping, makadi keponakan, misan, mindon

PAWOS : 100

SWADHARMANING AHLI WARIS

1. Nyalukin tetegenan sang maduwe ring warisan desa, banjar, muah paumahan
2. Nerima saha ngutsahayang tetamian saking kaluwargania
3. Ngabenang ngelantur ngatma wedana/nyekah sang sane kewarisin
4. Naur, nampi utang piutang lan sapanunggalan ipun

PAWOS : 101

TAN POLIH PAHAN WARIS, KENGIN MUPUNIN

1. Sane ngewarisin tan polih pahan waris yan prade :
 - ha. Matilar saking Agama Hindu
 - na. Sentana rajeg kesah mawiwahan, wiadin sentana lanang matinggal nyeburin, soang-soang kebawos ninggal kedaton
2. Sane kengin muponin kawenten wewarisane :
 - ha. Balu luh wiadin balu muani nyeburin boya sentana
 - na. Wong sane mulih daha utawi mulih truna, santukan pecak ninggal kedaton

PAWOS : 102

WARISAN SANE TAN DADOS KAEPAH WIADIN KAADOL

1. Merajan, sanggah lan sapanunggalang ipun
2. Pustaka mekadi : karis, lontar, cakepan lan sapanunggalan ipun, yan ngawinan ical pangurip-urip kasidian, miwah pawujudanipun
3. Sane patut ngraksa, ngupakara pustaka punika wantah sentana sane ngamong tetegenan sang sane maduwe warisan punika
4. PKD miwah AYDS

SARGAH V
SUKERTA TATA PALEMAHAN
Palet 1
PAWOS : 103
INDIK DRUWEN DESA

Padruwen Desa Adat Selat makadi :

1. Panyiwian Desa makadi : Pura Desa, Pura Puseh, Pura Dalem, Pura Dalem Nataran, Pura Alasangker, Pura Alasarum, soang-soang kaamong olih pamaksan. Pura Prajapati kalih palemahan : asiki megenah ring Baluan Br. Adat Tegal, kaamong olih Banjar Selat, malih asiki magenah ring Pacung Br. Adat Tegal, kaamong olih Br. Adat Tegal
2. Pratima/Pralingga
3. Sarana upacara, busana
4. Ratu Gede / Ratu Sakti, Ratu Mas
5. Gong lan sahanan sarana lelanguan
6. Bale wantilan ring jaba Pura Desa, wantilan lan tanahnyane ring jaba Pura Dalem

7. Tanah karang desa, inggih punika tanah sane wenten sajeroning Desa Adat Tanah Karang Desa punika kaperang dados tigang palih, luire :
 1. Tanah tegak merajan, sanggah, karang suci
 2. Tanah tegak paumahan, gedong, klumpu, pawaregan lan sapanunggalanipun
 3. Tanah teba genah wewalungan, pajedogan (WC), ngutang leluhu, tetanduran. Tanah munggah ring ajeng yadiastun keni pajeg bumi lan wangunan, nanging manggeh dados kakuasan Desa Adat, keni tetegenan panes tis manut pawos 103. Yan sang nanggap karang desa punika padem, tanah puniki katibang ring santananipun, madudonan karihinang sane pinih nampek nyaman. Yan kaputungan karang punika katibakang ring warga desa sane kaanggeh olih paruman desa. Yening ten wenten sane keanggeh patut, karang sane kaputungan punika, kaambil olih Desa Adat. Yan wenten karang padiyi / kadiyi magenah ring palemahan Desa Adat, sampun kaperang dados tegak merajan, tegak paumahan, wiadin teba, punika tan keni tetegenan ring desa, pateh kadi tanah karang desa.
8. Tanah sawah malinggah 2,7625 Ha maruntutan papagan 0,2250 Ha. 0,4900 Ha (4,9 are), genah Pura Prajapati (pacung) Banjar Adat Tegal 0,8800 Ha (8,8 are) tanah sawah di tegalantang Br. Adat Selat 6,00 are tanah genah wantilan di jaba Pura Dalem (Baluan), genah ngayut, genah ngutang leluhu 6,7 are
9. LPD Desa Selat / Lembaga Perkreditan Desa Adat Selat
10. Baga Usaha Padruwen Desa Adat (BUPDA)
11. Tata carane ngemargiang usaha inucap no 9 lan 10 manut pararem

PAWOS : 104

PAUPON-UPON LABA

1. Paupon-upon tanah laba pura kalih druwen desa kaenterang olih para juru desa, makadi sedahan penyarikan
2. Pikolih lanupon-upon tanah laba patut kaanggen prabia odalan, pawangunan muah sane sewos-sewosan manut kawigunaipun

3. Nyabran sangkepan I prajuru sane ngemong druwen desa patut nyiarang munjuk lungsur druwen desa
4. Sakaluring druwen desa patut wenten ilikitanipun
5. Tan kalugra ngingsirang / ngicalang druwen desa makadi ngadol, ngalah-alah, ngadeang, yan tan polih pamutus saking paruman desa
6. Pikolih lan upon-upon LPD patut kaepah-epah manut pararem

Palet 2

SUKERTAN LAN PEMITEGEP

KAPING 1

PAWOS : 105

KARANG, TEGAL, LAN CARIK

1. Warga sane ngemong karang paumahan, panegalane patut ngwentenang wates marupa tembok wiadin pagehan, pinih utama sane marep kamargine mangda katon asri
2. Karang wiadin panegalan patut mageleng keluanan, teges ipun magaleng kaler wiadin kangin. Sane ngardinin wates patut sang madue karang tegal ring tebenan, sane bedelodan wiadin bedauhan
3. Carik patut magaleng ke teben, artinipun magaleng kauh wiadin kelod, sane ngardinin wates patut sang madruwe carik ring luanan sane kangin wiadin kaler
4. Wates inucap kengin antuk pagehan wiadin pal saking KPT/ AGR/ TBT
5. Makarya wates wiadin tembok mangda kajantengan antuk penyandingnia
6. Yan wenten karang kabebeng, patut I prajuru ngutsahayang wenten margi
7. Yan wenten karang kaputungan wenang I prajuru nibakang karang ika, wenang katiba ring I krama paron

8. Krama pangele yan ten wenten waris, katur ke Desa, yan wenten karang
Desa kaepah dados kalih utawi langkungan patut tedun makrama Desa
keni ayah ngarep
9. Yan wenten warga padem ring pakarangan tegal anak sios, wenang sang
nruwenang sawa ika nyarunin, mrayascita genahe punika agung alit
manut dresta sastra lan Agama
10. Yan wenten warga padem tan wenten ngangkenin sawa ika, wenang
para juru masadok ring guru wisesa / pemerintah. Desa adat wenang
ngaryanin pamarisudan
11. Yan wenten warga ngentasang wangken manusa ring pakarangan, tegal
utawi carik anak sios, wenang sang nruwenang sawa ika nyarunin
mrayascita agung alit manut dresta karang tegal carik sane kaentasin.
Upakara upacara ika kamargiang ring genahe kahanan wangke pinih riin.
Sane kaentasan puput antuk tirta kawenten.

PAWOS : 106

TAN WENANG

1. Ngalah-alah karang, tegal, margi, carik miwah genah sane singanggeh
suci makadi kahyangan, setra lan sapanunggalanipun
2. Ngemabahan toya wit toyan limbah, wewalungan, pwaregan lan
sapanunggalanipun ka pekarangan anak sios (pateh sekadi wicara
karang kebebeng)
3. Ngentungan leluhu, wangke wewalungan ring pekarangan panegalan
anak sios, ka margi, gelinjingan (got) widin kapangkunge, majejemuhan
ring margi-margi
4. Ngentungan tulang manusa ring pekarangan, tengal, carik anak sios
kadanda mangda ngingsirang tulang punika, maprayascita ring genah
inucap
5. Makta tanah setra pekarangan, tegal rikalaning ngendag sawa
6. Yan wenten warga mamurug kecap ring ajeng, patut warga ika
ngewaliang tanahe sane kaambil, ngebet sane kapendem, nyampetin
sane kaembahin, ngingsirang sane marupa leluhu, wangken
wewalungan, tur patut warga ika kadanda agung alit manut kadi ring

ajeng, patut kawewahin antuk prayascita . yan ngeletehin genah sane sinanggeh suci angka 5, sajawaning kadanda kadi ring ajeng patut kawewehin antuk prayascita, caru, agung alit manut dresta kalih sastra agama.

KAPING 2

PAWOS : 107

PEPAYONAN

1. Nanem tanem tuwuh pepayonan patut adepa agung (1,5 m)
ngejeroang saking wates
2. Yan wenten taru mentik sajeroning wates, patut ika kaebah olih sang nruwenang, kabagi tiga, asiki katur ka desa, kakalih ring sang nruwenang wates
3. Yan wenten entik-entikan taru lan sapanunggalanipun mentik ngelintang wates, wenang entik-entikan ika kataban, kdruwenan olih sang madruwen karang sane kaentikan
4. Yan wenten taru ngungkulin utawi sinanggeh mayanin kapisaga l prajuru patut ngemargiang kadi ring sor :
 - ha. Natasang genah ipun
 - na. Yan sampun wyakti kapikayun, wit daunnia rob, utawi witipun banget sendeh, bungkilnia teda tetani, umahin semut lan sapanunggalanipun
 - ca. l prajuru patut niwakin sang nruwenang ika, notor, nyepat gantungin utawi ngebah masengker awuku
 - ra. Yan lintang kadi sengker ipun dereng kalaksanayang , wenang l prajuru nibakang ring keberatan nyepat gantungin utawi notor yan ipun ngungkulin, ngebah yan ipun mayanin
 - ka. Taru ika katiba sang notor, ngebah
 - da. Yan prade sadurung sengker metu mayanin, sang nruwenang taru luput ringkaiwangan

5. Yan wenten warga notor, monggol utawi ngebah taru, mawetu
mayaning ka pisaga, keni warga ika kadanda antuk biaya manut katiben
berat ingane baya
6. Yan wenten taru mayanin wewangunan, tan janten sapa sira
madruwene, tan dados kakenin prabia. Taru ika dados ka ambil olih sang
keni baya
7. Yan wenten papayonan bah ngerubuhan, mayanin ka pisaga sangkaning
bencana alam (alam, tanah longsor, hujan) sang sane nruwenang luput
ring kaiwangan

KAPING 3

PAWOS : 108

WEWANGUNAN

1. Saluwiring wewangunan mangda kautsahang nganutin kecap asta kosala
kosali miwah asta bumi
2. Yan wenten ngawit ngwangun raris nglintangin wiadin ngungkulin ka
pisaga, makadi capcapan lan sapanunggalanipun sang kababatan patut
sang madruwe wewangunan ika mamurug, kengin I prajuru nyepat
gantungin tur mangda sang madruwe wewangunan ika mugar, tan polih
prabia, kapocolan
3. Yening mamurug, kadi kecapa ring ajeng, prajuru adat sane nepasan

KAPING 4

PAWOS : 109

WEWALUNGAN

1. Sahananing warga desa sane mamiare sakaluring wewalungan patut
sayaga nitenin, negul wiadin ngandangin mangda tan ngrusak ka pisaga,
bilih-bilih ngranjing ka Pura wiadin ka pamerajan
2. Yan wenten wewalungan ngranjing ka genah suci, makadi merajan,
pura lan sapanunggalanipun, yadiastun katut duri, sang sane nruwenang
wewalungan ika patut kadanda mrasyascita nyaruin, agung alit manut
pararem kalih sastra agama

3. Prade wenten wewalungan ngeleb, tur ngrusak, nede tetanduran ka pisaga, wenang sang nruwenang wewalungan ika kadanda agung alit manut pararem. Sajawaning kadanda kadi ring ajeng, taler kasisipang naur sapangargan abian sane katede karusak, agung alit manut panglogikane para juru
4. Prade wenten wewalungan kataban olih prajuru adat metu padem sangakaning tan gumanti tur wenten saksi, sang naban luput ring kaiwangan
5. Yening wenten warga desa naban, nenten masadok ring prajuru desa adat, sane kataban jantos padem patut keni paridana

PAWOS : 110

TATA CARA NABAN

1. Sajeroning arahina sang polih naban wewalungan patut masadok ring para juru banjar/ desa adat
2. Sesampune limang rahina pasadok ring prajuru, tan wenten mariangkenin wewalungan ika, patut katur ring desa adat

PAWOS : 111

TAN DADOS NGANGON

1. Tan dados ngangon ring :
 - ha. Palemahan kahyangan, Parahyangan, Setra
 - na. Pantaraning pundukan, sawah
 - ca. Tanah desa, banjar jutawi ring pabian warga siosan
2. Prade wenten mamurug kadanda agung alit manut pararem. Yan ring palemahan kahyangan, setra, taler mrayascita nyaruin genah ika agung alit manut sastra dresta yening ring aksana (b) ring ajeng mangda ngicenin sambat sara

PAWOS : 112

PENGUTANGAN LELUWU

1. Krama desa ngutang leluwu ring genah sane sampun kacumawisan
2. Krama desa tan dados ngutang leluwu ring jalan-jalan, pangkung, tukad utawi genah sane kainggilan keasriane
3. Sajeroning nyujur keasrian palemahan, Desa Adat nitenin genah pengutangan leluwu
4. Krama desa sane mamurug ring pawos 112 inucap patut kadanda ageng/alit manut pararem

PAWOS : 113

NARKOBA

1. Krama Desa Adat Selat utawi sapasira ugi tan kadadosan mangan utawi ngadol Narkoba ring wawidangan Desa Adat Selat
2. Sapasira sane mamurug pawos 113, no. 1. Inucap patut kadanda manut pararem

SARGAH VI

WICARA, BHAYA, DUSTA LAN PAMIDANDA

Palet 1

INDIK WICARA

PAWOS : 114

1. Sane wenang mawosin makadi mutusang wicara-wicara ring Desa Adat inggih punika kerta desa, sane madudonan sekadi ring sor :
 ha. Kelian Banjar, pradene sang mawicara sane patunggilan banjar
 na. Bendesa Adat prade sang mawicara sami ring patunggilan Desa Adat utawi sane mawicara banjar kalawan banjar tiosan
2. Dudonan mawosang saha muputang wicara desa kadi ring sor:
 ha. Kaping ajeng kabawosang antuk Kelian Banjar
 na. Paruman banjar tan katinutin raris nunasang ring bendesa adat
 ca. Bendesa adat tan prasida muputang wicara sane wenten katincapang ring panglisir desa sane sinanggeh kerta desa
 ra. Prade taler pamutus tan kacumponing, katunasang ring paruman desa sinanggeh wasananing pamutus sasampune polih tatimbang ring M.ALIT kecamatan miwah M.MADYA kabupaten lan MAD Provinsi

PAWOS : 115

1. Sahanan wicara mawiwit kacorahan sakaluire sinanggeh nungkasin daging-daging awig-awig, paswara miwah pararem desa/banjar, patut digelis kabawosan tan nyantos pasadok
2. Sajaba wicara kadi ring ajeng patut nyantosang pasadok sang nunas bawos
3. Panepase patut pastika nyantenang iwang patut malarapan antuk Tri Pramana (saksi, ilikita, bukti) miwah tan maren nepek ring Catur Dresta

Palet 2

INDIK BAYA LAN DUSTA

PAWOS : 116

1. Parindikan bhaya luire : jiwa bhaya, artha bhaya (kapandung), dura cara ring agama miwah sane lianan
2. Sang manggihin kahanan jiwa bhaya, patut nepak kulkul bulus mapitulung manut pawos 57 aksara 3, wa

3. Prada ring desa kahanan jiwa bhaya, patut desane ngelaksanayang bhuta yadnya tur sang mayanin katur ring sang rumawos
4. Prada wenten jadmamamisuhtutawi nguman-uman ring paruman majeng ring padma sios, patut keni pamidanda marupa bea pacamil kadi dandaning nguman-uman ring sabha

PAWOS : 117

1. Sang manggihin kahanan artha bhaya (kamalingan), patut ngulkul mapitulung manut ring pawos 57 aksara 3, wa utawi sang kamalingan atur supeksa ring prajuru desa sane pacing nandanin saha mawuwuh panyangaskara prade wenten jadmangemaling barang sinanggeh suci
2. Patingkah mapailon ring dusta kawos saruron, utawi prada wenten jadmamanggihin tan nyadokang ring prajuru jantos jadmamaling, makweh pangargan danda nyane manut cacakan dusta kamalingannyane, tur prada rawuh ping tiga melaksana asapunika wenang kasukserah ring sang ngawiwenang
3. Prade wente jadmangerereh reramon, minakadi daun kelapa, ron, muah sane lianan tan pasadok ring sang nruwenang, prade kacunduk (ketara) patut kadanda kadi dandaning maling
4. Yening wenten jadmangrajinin pakebon wiadin pakarangan tios rikala suwung, mawastu sang mandruwe karang kaicalan, wenang jadmamucap katuwekan antuk madewa saksi ring pura bale agung. Mangda tan katuwekan manut ring ajeng, asing-asing ngrajingin kubon jadmamaling sane suwung patut :
 ha. Matengeran suara (makakaukan)
 na. Nyantosang sang nruwenang karang rawuh utawi masadok ring pangapit pinih tampek, maka buatan pangrajin
 ca. Pamekadi karangnya kasawen, makacihna pangarah rikala suwung

Palet 3

INDIK PAMIDANDA

PAWOS : 118

1. Desa / banjar wenang niwakang pamidanda ring warga desa sane sisip
2. Paniwak inucap kamargiang olih bandesa / kelian banjar :
3. Bacakan pamidanda luire :
 - ha. Ayahan kasisipan
 - na. Danda artha (dosa, danda, saha panikel patuturan)
 - ca. Rarampasan
 - ra. Kadaut karang ayahanya, utawi kasepekan
 - ka. Panyangaskara
 - da. Kawaliang pipilnyane (kawusan makrama)
4. Pamidanda sane katiwakang patut masor singgih manut ring kasisipane
5. Jinah utawi raja brana pamidanda ngranjing dados druwen desa/banjar

PAWOS : 119

1. Krama sane langkungan tigang paruman nglantur tan nawur urunan miwah dadandan wenang karampag
2. Rarampagan ngangge tata cara, kadi ring sor :
 - ha. Kalaksanayang antuk prajuru kasarengin antuk krama desa tigang diri maka saksi
 - na. Sang ngrampag madasar darsana ngambil barang utawi nyawenintanem tuwuh, akehnya manut ring hutang karampag
 - ca. Prajuru miteketang mangda barang-barang sane karampag digelis katebus, masengker awuku ring rahina pacang kadol
 - ra. Sane patut kaimpasin sajeroning ngamargiang rarampagan inggih punika tan nganinin saluwir barang sane patut inggilang manut agama miwah mademang pangupa jiwa sang karampag

PAWOS : 120

1. Prade sang pacang karampag ngwara (ngalangin) pamargi inucap mawastu sampun tan nganutin utawi nenten ngalinguang sadaging awig-awig desa wenang jadma punika kapiteketin indik sulur wiwah atiti

krama dados krama desa adat mangda prasida nginutin sasanan krama
manut pangajah Agama Hindu

2. Prade mamengkung, maparilaksana nyapa kadi aku, wenang karang
desa kagenahin antuk jadma punika kadaut antuk desane utawi
kasepekan
3. Samalih yan purun taler ngalengin pamargi kadi ring ajeng tan wenten
pamargi sajawaning kawaliang pipil nyane (kawusang makrama)
4. Pamidanda inucap ring ajeng keni buntas risampun sang kadanda punika
ngamargiang
5. Nunas geng pangampura ring krama desa riantukan nguak pasubhya (
pararem) pecak
6. Nawur pangangan panguwuk pasubaya duk pacang karampag kadulurin
pamrayascita
7. Prasida katampi malih makrama duaning sampun sida ngesehin
solahnyane

SARGAH VII

PAWOS : 121

NGUWAH-NGUWUHIN AWIG-AWIG

1. Nguwah–nguwuhin awig-awig, kamargiang olih Paruman Agung
2. Pamutus bebawosane mangda kautsahayang metu saking pikayun gilik-
saguluk

PAWOS : 122

1. Awig –awig puniki kamanggehang sajeroning Desa Adat Selat
2. Sakaluiring sane durung kaanggehang sajeroning awig-awig puniki, patut
kalaksanayang manut tata cara sane sampun ketah mamargi (pararem)

SARGAH VIII

SAMAPTA

PAWOS : 123

1. Awig –awig puniki kawastanin Awig-awig Desa Adat Selat
2. Awig-awig puniki kamargiang kasungkemin ring paruman Agung Desa Adat Selat

PAWOS : 124

1. Awig – awig puniki kasungkemin ring paruman duk rahina Saniscara Wage Tambir pin/pang 6 sasih Kawulu icaka warsa 1943 tanggal masehi 08 Januari 2022 ring Desa Adat Selat
2. Awig-awig puniki kalinggatanganin olih Bendesa Adat, kasarengin kelian-kelian Banjar / tempekan saha kasaksinin antuk kelian-kelian Banjar Dinas miwah Perbekel / Lurah sewewidangan Desa Adat Selat, Kecamatan Abiansemal, M.ALIT Kec. Abiansemal lan M.MADYA Kab. Badung , saha kapikukuhin antuk Bupati.